

OSLOBODENJE

Objavljeno:06.02.2017.

Elektroprivreda BiH: Nismo krivi za ekološku katastrofu na Jablaničkom jezeru

Elektroprivreda BiH saopćila je da nije izazvala ekološku katastrofu na Jablaničkom jezeru i da nije ugroženo propisano ispuštanje vode.



Foto: Nisad SELIMOVIĆ

- Period od septembra do kraja prošle godine, kao i januar 2017. godine, karakterišu se kao hidrološki izuzetno sušni periodi, što je imalo direktnog odraza na stanje prirodnih dotoka vode na slivu rijeke Neretve, kao i na stanje zaliha vode u akumulaciji HE Jablanica - saopćeno je iz EP BiH.

JP Elektroprivreda BiH je, kako dodaju u saopćenju, bez obzira na ove okolnosti, vršila uredno snabdijevanje kupaca električnom energijom, ali i neprekidno obezbjeđivala propisano ispuštanje vode nizvodno od svojih akumulacija.

- Zbog veoma niskih temperatura u januaru ove godine i obezbjeđenja potrebnih količina električne energije, došlo je do pada kote akumulacije HE Jablanica. Međutim, ni u ovakvim okolnostima nije ugroženo propisano ispuštanje vode, niti enormno pražnjenje akumulacije u druge namjene, osim potrebe za podmiranjem potreba elektroenergetskog sistema. Dakle, kroz obezbjeđenje propisanog ispuštanja vode nizvodno od akumulacije HE Jablanica, kao i nizvodno od akumulacija HE Grabovica i HE Salakovac, JP Elektroprivreda BiH nije uzrokovala ekološku katastrofu - ističe se u saopćenju.

Povoljan hidrološki razvoj u posljednjih nekoliko dana rezultirao je povećanjem kote akumulacije HE Jablanica za pet metara, a daljnje povećanje kote očekuje se u narednom periodu.

- Slične hidrološke prilike bile su karakteristične i za 2012. godinu. Ni u tom periodu aktivnostima JP Elektroprivreda BiH nije bila ugrožena flora i fauna Jablaničkog jezera, odnosno, riblji fond je u potpunosti sačuvan - navode iz Službe za komunikacije EPBiH.

Jablaničko jezero je, kao što je poznato, **u potpunosti nestalo**, a time i cjelokupno riblje bogatstvo.

Prema navodima ribara, Elektroprivreda je pustila vodu prije 40-ak dana bez ikakve prethodne obavijesti, a nestankom jezera nestalo je i dva milona miliona ribljih jedinki.

Objavljeno: 06.02.2017.

Društvo

Elektroprivreda BiH se oglasila u vezi sa katastrofom na Jablaničkom jezeru



Period od septembra do kraja prošle godine, kao i januar 2017. godine, karakterišu se kao hidrološki izuzetno sušni periodi, što je imalo direktnog odraza na stanje prirodnih dotoka vode na slivu rijeke Neretve, kao i na stanje zaliha vode u akumulaciji HE Jablanica, saopštili su iz Elektroprivrede BiH.

"JP Elektroprivreda BiH je bez obzira na ove okolnosti vršila uredno snabdijevanje kupaca električnom energijom, ali i neprekidno obezbjeđivala propisano ispuštanje vode nizvodno od svojih akumulacija. Zbog veoma niskih temperatura u januaru ove godine i obezbjeđenja potrebnih količina električne energije, došlo je do pada kote akumulacije HE Jablanica. Međutim, ni u ovakvim okolnostima nije ugroženo propisano ispuštanje vode, niti enormno pražnjenje akumulacije u druge namjene, osim potrebe za podmirjenjem potreba elektroenergetskog Sistema", navodi se u saopštenju.

Ističu da kroz obezbjeđenje propisanog ispuštanja vode nizvodno od akumulacije HE Jablanica, kao i nizvodno od akumulacija HE Grabovica i HE Salakovac, JP Elektroprivreda BiH nije uzrokovala ekološku katastrofu.

"Povoljan hidrološki razvoj u posljednjih nekoliko dana rezultirao je povećanjem kote akumulacije HE Jablanica za 5 metara. Dalje povećanje kote očekuje se u narednom periodu. Slične hidrološke prilike bile su karakteristične i za 2012. godinu. Ni u tom periodu aktivnostima JP Elektroprivreda BiH nije bila ugrožena flora i fauna Jablaničkog jezera, odnosno, riblji fond je u potpunosti sačuvan", zaključuje se u saopštenju.

OSLOBODENJE

Objavljeno: 07.02.2017.

Federalna inspekcija o Jablaničkom jezeru: Nije zapažena nijedna uginula riba

Federalna uprava za inspekcijske poslove je utvrdila da je zbog niskih temperatura i povećanja potrošnje električne energije i osiguranja funkcionisanja



elektroenergetskog sistema HE Jablanica bili prinuđeni nastaviti proizvodnju električne energije na kotama koje su ispod minimalnog graničnog stanja za januar.

Podsjetimo, **Elektroprivreda BiH saopćila je da nije izazvala ekološku katastrofu** .

U izvještaju koji je sačinio glavni federalni vodni inspektor nakon obilaska HE Jablanica, navodi se da

nije zapažen nijedan primjerak uginule ribe.

Iz kabineta direktora Federalne uprave za inspekcijske poslove (FUZIP) su istakli da je inspektor konstatovao da je minimalno ispuštanje vode propisano vodnom dozvolom u skladu s istom.

- U proteklih nekoliko mjeseci došlo je do poremećaja u smislu hidroloških prilika kada je u pitanju dotok vode u akumulaciju Jablaničko jezero, koji su uzrokovani vrlo oskudnim padavinama. Pored toga korištenje akumulacije HE Jablanica je vršeno tako da su se poštovali uslovi vezano za poželjno, odnosno granično stanje akumulacije, navodi se u saopštenju FUZIP-a.

Naveli su da su od 8. januara ove godine zbog izuzetno niskih temperatura, povećanja potrošnje električne energije i osiguranja urednog napajanja potrošača, ali i sigurnog funkcionisanja elektroenergetskog sistema, u HE Jablanica bili prinuđeni nastaviti proizvodnju električne energije na kotama koje su ispod minimalnog graničnog stanja koje je za mjesec januar definisano vrijednošću od 245,00 m.n.m.

- Kota je krajem januara pala na vrijednost 238,66 m.n.m. i od tada se intenzivno vrši punjenje akumulacije. Na današnji dan kota akumulacije iznosi 247,07 m.n.m. I pored ovako lošeg hidrološkog stanja HE Jablanica je ispuštala vodnom dozvolom propisani minimum vode koji ne smije biti manji od 40 m³/s, istakli su iz FUZIP-a.

Prema njihovim podacima prosječno ispuštanje vode za novembar je 132,85 m³/s, za decembar 122,49 m³/s, a za januar 85,34 m³/s.

Zbog hidrološki sušnog perioda, slabijeg dotoka vode te maksimalnog korištenja zaliha vode radi proizvodnje električne energije Jablaničko jezero, jedno od najvećih akumulativnih jezera u Bosni i Hercegovini (BiH), gotovo je presušilo proteklih dana.


Ekološke i ribarske udruge tvrde da je Elektroprivreda BiH prije 40 dana ispustila vodu na brani uz jezero bez ikakvog ranijeg najavljanja što će, naveli su, imati dugoročne katastrofalne posljedice po ekosistem i riblje bogatstvo u tom području.

Iz Elektroprivrede BiH su jučer odbacili sve optužbe o izazivanju ekološke katastrofe. Istakli su da nije ugroženo propisano ispuštanje vode za druge namjene, osim za podmirenje potreba elektroenergetskog sistema, prenosi Anadolija.

Objavljeno:07.02.2017.

Ispuštanje vode u dozvoljenim granicama

Federalna inspekcija tvrdi: Nema ekološke katastrofe na Jablaničkom jezeru!



(Foto: Dž. Džino)

Radnje koje je preduzimala Elektroprivreda BiH na ispuštanju vodene akumulacije iz Jablaničkog jezera su u granicama dozvoljenih, ustanovila je federalna inspekcija.

Prema njihovim tvrdnjama, nedostatak padavina i povećana potrošnja električne energije doveli su do pražnjenja jezera, ali ne i do ekoloških posljedica.

Elektroprivreda Bosne i Hercegovine jučer je negirala odgovornost za ekološku katastrofu u Jablaničkom jezeru.

Period od septembra do kraja prošle godine, kao i januar 2017. godine, karakterišu se kao hidrološki izuzetno sušni periodi, što je imalo direktnog odraza na stanje prirodnih dotoka vode na slivu rijeke Neretve, kao i na stanje zaliha vode u akumulaciji HE Jablanica, saopćeno je iz Elektroprivrede.

- JP Elektroprivreda BiH je bez obzira na ove okolnosti vršila uredno snabdijevanje kupaca električnom energijom, ali i neprekidno obezbjeđivala propisano ispuštanje vode nizvodno od svojih akumulacija. Zbog veoma niskih temperatura u januaru ove godine i obezbjeđenja potrebnih količina električne energije, došlo je do pada kote akumulacije HE Jablanica. Međutim, ni u ovakvim okolnostima nije ugroženo propisano ispuštanje vode, niti enormno pražnjenje akumulacije u druge namjene, osim potrebe za podmiranjem potreba elektroenergetskog sistema.

Dakle, kroz obezbjeđenje propisanog ispuštanja vode nizvodno od akumulacije HE Jablanica, kao i nizvodno od akumulacija HE Grabovica i HE Salakovac, JP Elektroprivreda BiH nije uzrokovala ekološku katastrofu.

Povoljan hidrološki razvoj u posljednjih nekoliko dana rezultirao je povećanjem kote akumulacije HE Jablanica za 5 metara. Dalje povećanje kote očekuje se u narednom periodu.

Slične hidrološke prilike bile su karakteristične i za 2012.godinu. Ni u tom periodu aktivnostima JP Elektroprivreda BiH nije bila ugrožena flora i fauna Jablaničkog jezera, odnosno, riblji fond je u potpunosti sačuvan - navode iz Elektroprivrede.

OSLOBODENJE

Objavljeno :19.04.2017

Hiljade ljudi bez električne energije: Problemi i u vodosnabdijevaju

Nevrijeme i teški snježni nanosi su od sinoć prouzrokovali veći broj kvarova na elektroenergetskoj mreži Elektroprivrede BiH.

Na području Tuzlanskog kantona bez snabdijevanja električnom energijom je više od 16 hiljada krajnjih kupaca u općinama Kladanj, Živinice, Srebrenik, Kalesija, Gračanica i gradu Tuzla, a zbog prekida u napajanju 10 kV dalekovoda.

Problemi i u KS-u

Bez električne energije je 8.415 kupaca na području Srednjobosanskog kantona, u općinama Travnik, Novi Travnik, Bugojno, Gornji Vakuf, Vitez i Fojnica.

U Zeničko-dobojskom kantonu bez napona su kompletna područja Zavidovića i Vozuće.

Teška situacija je i u Varešu gdje je bez napajanja 51 trafo stanica, Maglaju 45 i Kaknju 61 trafostanica. Bez napona su i 122 trafo stanice u Zenici i 37 u Visokom.

Veći broj kvarova evidentiran je i na području Kantona Sarajevo.

Bez snabdijevanja električnom energijom trenutno su područja koja se snabdijevaju preko dalekovoda: Rakovica, Tarčin do Bradine, Blažuj-Ilijaš, Nišići-Vareš, Ilijaš-Podlugovi-Bioča, dio Semizovca, Nišići-Crna rijeka i Srednje, Nahorevo, te naselja Dobroševići, Bojnik, Crnotina, Rječica, Mihaljevići i Kakrinje.

Na više mjesta u Sarajevskom kantonu pali su nadzemni vodiči, te stoga iz Elektrodistribucije Sarajevo upućuju apel građanima da odmah pozovu Informativni centar na besplatni telefon 080 020 133 i da, do dolaska elektromonterske ekipe, obrate pažnju da niko ne prilazi vodičima koji su vjerovatno pod naponom.

Zbog prekida u napajanju 10 kV dalekovoda, u Hercegovačko-neretvanskom kantonu bez električne energije je 2931 kupac na području Konjica i Jablanice.

Sve raspoložive elektromonterske ekipe Elektroprivrede BiH su angažirane i otklanjanje kvarova je u toku, saopćeno je iz Služba za komunikacije Elektroprivrede BiH.

Zbog vremenskih prilika, koje su nastupile u toku noći i u jutranjim satima, dolazilo do čestih strujnih udara i poremećaja u snabdijevanju električnom energijom izvorišta i pumpnih stanica, što za posljedicu ima poremećaj u snabdijevanju vodom šireg gradskog područja, navode iz KJKP Vodovod i kanalizacija.

Ekipe su na terenu i očekuje se stabilizacija u toku dana, saopćeno je iz Vodovoda i kanalizacije.

Kvarovi

Danas će se vršiti popravke kvarova na lokacijama: IV Viteške brigade, Gorana Čišića, Akifa Šeremeta, Velešići, Aleksandra Puškina, Zaima Šarca, Reljevo, Josipa Slavenskog, Zmaja od Bosne, Pavla Lukača, Safvet bega Bašagića, Kovači – Stari grad, Grdonj, Maguda, Huremuša, ispiranje novopoloženih dionica kod A - transferzale, u Banjskoj, te polaganje cjevovoda u Alipašinoj –Zije Dizdarevića .

Tokom popravke pobrojanih kvarova, dolazit će do poremećaja u vodosnabdijevanju u ulicama/naseljima: 4. viteške brigade, Gorana Čišića, naselje Doglodi, Velika Aleja, Akifa Šeremeta, Aerodromsko naselje, Velešići, Gornji Velešići, Aleksandra Puškina, Fadila Jahića Španca, Zaima Šarca, Višnjik, Bolnička, Bjelave, Reljevo, Josipa Slavenskog, Zaima Topčića, Zmaja od Bosne, Pavla Lukača, Derviša Numića, Avde Smailovića, Safvet Bega Bašagića, Kovači, Grdonj, Nedžada Musića, Panjina kula, Maguda, Alifakovac, Džemala Čelića, Huremuša, Bistrik, Bistrik basamac, Bakarevića, Franjevačka.

U toku dana doći će do kratkotrajnog isključenja snabdijevanja vodom zbog popravke kvarova u šahtovima u ulicama:Kobiljača, Kenana Demirovića, Dr.Fetaha Bećirbegovića, Tuzlanska čikma.

Objavljeno: 19. 04. 2017

"Elektroprivreda BiH": Snježni nanosi izazvali izuzetno veliki broj kvarova



Nevrijeme i teški snježni nanosi, od sinoć (18. aprila 2017. godine) prouzokovali su izuzetno veliki broj kvarova na nadzemnoj elektroenergetskoj mreži u Kantonu Sarajevo, saopćeno je iz Informacionog centra "Elektroprivrede BiH".

Na više mjesta pali su nadzemni vodići, pa molimo građane da odmah pozovu naš Informativni centar na besplatni telefon 080 02 01 33 i da, do dolaska naše elektromonsterske ekipe, pripaze da niko ne prilazi vodićima koji su vjerovatno pod naponom.

Bez snabdijevanja električnom energijom trenutno su područja koja se snabdijevaju električnom energijom preko dalekovoda Rakovica, Tarčin do Bradine, Blažuj-Ilijaš, Nišići-Vareš, Ilijaš-Podlugovi-Bioča, dio

Semizovca, Nišići – Crna rijeka i Srednje, Nahorevo, te naselja Dobroševići, Bojnik, Crnotina, Rječica, Mihaljevići, Kakrinje. Također, mnogo je kvarova na niskonaponskoj nadzemnoj mreži i priključcima.

Molimo naše sugrađane za strpljenje, jer je prioritet otklanjanje opasnosti po život, a onda i uspostavljanje normalnog snabdijevanja električnom energijom.

- Još jednom, molimo sve građane koji primijete vodiće električne energije koji su pali, da ih ne diraju i da pozovu naš Informativni centar, te da pripaze da niko ne prilazi vodićima električne energije - saopćeno je.

Objavljeno: 21. 04. 2017 .

Otkrivamo: EPBiH preko leđa građana namjerava pokriti gubitke

Struja za domaćinstva poskupljuje za 20 posto?



"Elektroprivreda BiH": Pripreme traju mjesecima

Uprava „Elektroprivrede BiH“ zbog gubitaka u prvom kvartalu ove godine, koji iznose 18 miliona maraka, planira povećati cijenu struje za domaćinstva u Federaciji i do 20 posto, saznaje „Dnevni avaz“ iz izvora bliskih Federalnoj vladi.

Upravo su Vladi FBiH prije nekoliko dana dostavljeni podaci o poslovanju EPBiH za prva tri mjeseca.

Održan sastanak

Uprava EPBiH, saznajemo, već je razmotrila ozbiljnu analizu kako će pristupiti ovom planu, a sve radi stabilizacije poslovanja. O toj temi prije nekoliko dana održan je i sastanak u EPBiH, a već danima se analizira trenutno stanje radi povećanja cijena.

Saznajemo da je u pripremi inicijativa da prijedlog za izmjenu tarife što prije bude upućen na saglasnost Nadzornom odboru EPBiH, a nakon toga i FERK-u.

Zbog loše pripremljenosti za zimski period, koji je pratio manjak isporuke uglja rudnika hidroelektranama, loše hidroakumulacijske sezone, ali i enormne potrošnje struje domaćinstava tokom žestokih minusa, „Elektroprivreda BiH“ bila je primorana kupovati struju na berzi po cijenama mnogo višim od onih po kojima ju je proizvodila i prodavala.

mjesec	Sanacija prinudnih izlazaka iz pogona termo blokova i pokrivanje debalansa			Energetska konsolidacija *)			Kupovina energije na tržištu na periodu do jednog kvartala			UKU	
	MWh	KM/MWh	KM	MWh	KM/MWh	KM	MWh	KM/MWh	KM	MWh	KM/M
januar	23.029	191,13	4.401.466,10	160.198	137,37	22.005.780,36	137.040	76,73	10.514.950,80	320.267	115,2
februar	3.935	103,36	406.721,90	149.345	149,40	22.312.039,60	71.651	76,97	5.514.796,40	224.931	125,5

Faksimil koji pokazuje za koliko je EPBiH kupovala struju

Tako je „Elektroprivreda BiH“ struju proizvodila i prodavala po 42,60 eura po megavat-satu, a na berzi kupovala i po 115,29 eura po megavat-satu u januaru, a u februaru i po 125,52 eura. Samo u januaru kupljeno je struje za 36,9 miliona KM, a u februaru za 28,2 miliona KM, zbog čega je EPBiH pretrpjela ozbiljne gubitke.

Cijena struje po kojoj EPBiH trenutno prodaje struju domaćinstvima iznosi 32 eura po megavat-satu, s tim da je intencija da se ona sada poveća i do 39 eura. Na tržištu je prodaju po 44 eura i tu neće biti promjena.

Vlastite rezerve

Za sada nema pojašnjenja iz EPBiH zašto gubitke ne pokrivaju iz vlastitih rezervi, što je jedan od prijedloga, zatim smanjenjem broja uposlenih, umanjnjem enormnih plaća, visokih troškova reprezentacije, voznog parka, nego su se odlučili na novi udar na džepove građana.

Rudnici prodavali uglj Srbiji

Pojedini rudnici koji posluju u Koncernu EPBiH, saznajemo, umjesto isporuke uglja termoelektranama i EPBiH, ovaj energent prodavali su kupcima iz Srbije. Da stvar bude gora, nijedan rudnik po važećem ugovoru ne plaća penale zbog kašnjenja u isporuci. Na taj način su prodajom uglja kupcima u Srbiji ostvarivali dvostruko veću zaradu od one koju prodaju EPBiH.

- 185.000 tona uglja iznosio podbačaj za prva dva mjeseca 2017.
- 158.000 tona uglja bila manja zaliha na depoima

Autor: M. AŠČIĆ

Objavljeno: 27. 04. 2017.

Zbog duga od 1,3 miliona KM pisali bh. institucijama

"Elektroprivreda BiH" želi isključiti struju BHRT-u!



Uprava „Elektroprivrede BiH“ poslala je 21. aprila na adrese nekoliko bh. institucija, među kojima su i Vlada Federacije i Vijeće ministara BiH, pismo u kojem ih obavještava da će zbog duga BHRT-a za električnu energiju, koji iznosi 1,3 miliona KM, biti prinuđena da im isključi struju, ekskluzivno otkriva „Dnevni avaz“.

Nema dogovora

U pismu, koje je u posjedu našeg lista, a koje potpisuje Bajazit Jašarević, generalni direktor EPBiH, navodi se da su na ovaj korak prinuđeni radi naplate svojih potraživanja koja iznose 1.347.995 maraka, a u dugovanja nisu uračunate ni zatezne kamate.

Indikativno je da RTVBiH nije prekidala svoj program ni u vrijeme agresije na BiH, a ovakvom odlukom EPBiH bio bi doveden u pitanje opstanak BHRT-a, s tim da bi i veliki broj zakupaca koji koristi njihov predajnik također ostao bez struje, poput telekom operatera, mnogih državnih agencija i privatnih komercijalnih TV kuća.

U dopisu se, također, navodi da EPBiH već duže od dvije godine neuspješno pokušava ostvariti naplatu potraživanja i da se dug kontinuirano povećava. Istaknuto je da su im nuđeni i prijedlozi za zaključenje sporazuma za odgođeno plaćanje, ali da su iz BHRT-a odgovorili da su u teškoj finansijskoj situaciji i da „nisu u mogućnosti izmirivati obaveze ni po osnovu tekuće potrošnje“.

**Predmet: Potraživanja po osnovu isporučene električne energije od
Radio-televizije Bosne i Hercegovine Sarajevo (BHRT)**

Poštovani,

Dužni smo Vas upoznati sa činjenicom da dugovanje za utrošenu i isporučenu televizije Bosne i Hercegovine Sarajevo (BHRT) prema JP Elektroprivreda B 31.03.2017.god dostigao iznos od **1.347.995,25 KM**.

U navedeni dug nije uračunat iznos po osnovu obračunatih zakonskih zateznih obračunati po osnovu Zakona o obligacionim odnosima, čl. 277 („Sl. novine F o visini stope zatezne kamate („Sl.novine F BiH“ br. 56/04, 68/04,29/05 i 48/1 Potsjećamo, da smo Vašem ministarstvu, pismo slične sadržine dostavili i prije dug bio dvostruko manji, cca 600 hilj. KM (dopis broj: 01-04-9749/16 od 3 nikada nismo dobili bilo kakvo izjašnjenje ili odgovor.

JP Elektroprivreda BiH d.d. – Sarajevo već više od dvije godine, bezuspješno svojih potraživanja, koja kontinuirano rastu, (iznos duga u junu 2015. iznosi novembru 2015. cca. 450 hiljada KM, a na dan 22.02.2016. cca. 600 hilj. KM) iznos od 1,35 miliona KM, o čemu je konstantno upozoravala odgovorne rješenja, što je, na žalost ostajalo bez bilo kakvih pomaka i rezultata, a uk povećavao.

Napominjemo da je JP EP BiH, u proteklom periodu, više puta kontaktirala me prijedlog/ponudu zaključenje Sporazuma za odgođeno plaćanje, odnosno n duga, uz redovno plaćanje tekuće potrošnje, ali da od BHRT-a nije bilo z telefonskih izjašnjenja u kojima su navodili da su u teškoj finansijskoj situac izmirivati obaveze ni po osnovu tekuće potrošnje, te da očekuju pomoć od svo

U skladu sa navedenim, a kako se dug BHRT-a u protekle dvije godine kontin nam je, ovim putem obavijesti Vas, da je u cilju naplate svojih potraživan električne energije kao i zaštite vlastitih interesa, JP Elektroprivreda BiH o postupiti prema odredbama slijedećih pozitivnih propisa.

Imajući u vidu naprijed izneseno, te ukoliko se u najskorije vrijeme ne realiz potraživanja u skladu sa Odlukom o utvrđivanju povoljnijih uslova za zaključ dospjelog duga prema javnim preduzećima („Službene novine Federacije BiH ne iznađe bilo koje drugo rješenje, a najkasnije do 31.05.2017. godine, JP E Sarajevo će biti prinuđena i obavezana u cilju naplate svojih potraživanja izvršit električne energije za BHRT.

Iz BHRT-a su nas upozorili na činjenicu da bi u slučaju isključenja BHRT-a, koriste objekte i predajnike BHRT-a (institucija, agencija, telekom operater subjekata) ostao bez napajanja el. energijom od kojih bi posebno istakli najzna

- Državne agencije, (CIPS, Granična služba, Civilna zaštita, Ministarstvo
- Telekom operateri, (BH Telekom, HT Eronet, M: Tel);
- Javni servisi, (BHRT, Federalna); TV SA, OBN, PINK, Hayat i mnogi

Imajući u vidu sve naprijed navedeno, molimo Vas da svojim autoritetom u obaveza BHRT-a u cilju sprječavanja daljnjeg povećanja potraživanja JP E Sarajevo.

S poštovanjem,



- Imajući u vidu naprijed izneseno, te ukoliko se u najskorije vrijeme ne realizuje mogućnost izmirenja potraživanja ili se ne iznađe bilo koje drugo rješenje, a najkasnije do 31. maja ove godine, "Elektroprivreda BiH" bit će prinuđena i obavezana u cilju naplate svojih potraživanja izvršiti mjeru obustave isporuke električne energije za BHRT - navodi se u pismu Jašarevića.

Državne agencije

Alarmantno je i što bi isključivanjem struje BHRT-u, kako se i navodi u dopisu EPBiH, bez napajanja ostao i veliki broj zakupaca koji koriste predajnike BHRT-a.

- Riječ je o državnim agencijama: CIPS, Granična služba, Civilna zaštita, Ministarstvo unutrašnjih poslova, telekom operateri – „BH Telecom“, „HT Eronet“, „M:tel“, ali i javni servisi, BHRT, Federalna, TVSA, OBN, Pink, Hayat i mnogi drugi - istaknuto je u dopisu.

Ko su najveći dužnici

Naš list saznaje da su među najvećim dužnicima za utrošenu električnu energiju firme namjenske industrije Federacije, koje EPBiH duguju oko 20 miliona KM, zatim slijede mostarski „Vodovod“ i mostarska bolnica. Slično je i sa mnogim drugim državnim firmama, poput GRAS-a.

Zbog 1,3 miliona KM duga prijeti isključenje struje BHRT-u 0 Share 0 Tweet 0 Share 0 Mail 0 Mail
Zbog 1,3 miliona KM duga prijeti isključenje struje BHRT-u Srna 26.04.2017 10:08 SARAJEVO-
Uprava "Elektroprivrede BiH" uputila je pismo na adrese nekoliko institucija, među kojima su
Vlada Federacije BiH i Savjet ministara BiH, u kojem ih obavještava da će zbog duga BHRT-a za
električnu energiju od 1,3 miliona KM biti prinuđeni da im isključe struju. U pismu direktora
"Elektroprivrede BiH" Bajazita Jašarevića, čije je dijelove objavio "Dnevni avaz", navodi se da je
ova kompanija prinuđena na takav korak radi naplate svojih potraživanja koja iznose 1.347.995
KM, te da u dugovanja nisu uračunate ni zatezne kamate. Jašarević navodi da će
"Elektroprivreda BiH" biti prinuđena na to ukoliko se u najskorije vrijeme ne realizuje mogućnost
izmirenja potraživanja ili se ne iznađe bilo kakvo drugo rješenje, najkasnije do 31. maja.

OSLOBODENJE

Objavljeno: 07.06.2017.

Sporazum EPBiH i Telemacha

Ugovor garantuje učinkovitije i sigurnije korištenje niskonaponskih stubova

Telemach će EPBiH uplatiti 4,22 miliona KM

JP Elektroprivreda BiH i Telemach potpisali su ugovor o saradnji za korištenje niskonaponskih stubova u vlasništvu JP Elektroprivreda BiH za razvoj Telemach širokopojasne mreže. U skladu sa propisima EU za omogućavanje bržeg razvoja širokopojasnog pristupa, Elektroprivreda BiH i Telemach dogovorili su uslove ugovora koji omogućavaju siguran kontinuitet i unapređenje koegzistencije električne i širokopojasne infrastrukture na istim stubovima niskonaponske infrastrukture.

Ugovor predviđa stroge sigurnosne procedure i zajednički nadzor i održavanje vlastitih mreža i donosi direktnu korist za Elektroprivredu BiH, razvoj konkurentnosti telekomunikacijskog tržišta i za građane BiH.

Kompanija Telemach će Elektroprivredi BiH uplatiti 4,22 miliona KM kao naknadu za korištenje u proteklom periodu, a za buduće korištenje dogovoreni su uslovi u skladu s najboljom regionalnom i evropskom praksom.

“Angažovali smo naše najbolje ljude na ovom projektu, sa zadatkom da detaljno analiziraju situaciju i predlože najbolje rješenje. Ovaj sporazum garantuje učinkovitije i sigurnije korištenje niskonaponskih stubova od timova za održavanje EPBiH i Telemacha, čime predstavlja novu vrijednost za obje kompanije i građane BiH”, kazao je Bajazit Jašarević, generalni direktor EPBiH.

[Minela Pamuk](#)

Objavljeno:07.06.2017.

ELEKTROPRIVREDA BIH OTVORILA BESPLATNU PUNIONICU ZA ELEKTRIČNA VOZILA



Elektroprivreda Bosne i Hercegovine besplatno je na raspolaganje stavila punionicu za električna vozila ispred zgrade Direkcije u Sarajevu, u želji da širi priču o vozilima na alternativna goriva, a čije su prednosti brojne. To preduzeće za početak je počelo koristiti dva električna vozila koja su predstavili u okviru trodnevnog sajma energetike "Energa", u sklopu konferencijskog dijela "Dani Elektroprivrede BiH". Iako takav automobil košta znatno više, npr. ako je dizel 50.000 KM,

električni je više od 90.000 KM, u ime EPBiH -Sektora za strateški razvoj, Adnan Bosović je kazao da je ovakve automobile znatno jeftinije održavati, a da na 100 kilometara troše do dvije KM električne energije. "Cijena će svakako padati masovnom proizvodnjom, ali za početak sve razvijene zemlje, pa i susjedna Hrvatska, uvele su poticaje za ovakve automobile, jer su prepoznale prednosti", rekao je Bosović, te naglasio da sve elektroprivrede Evrope vide sektor transporta kao novo tržište. Pojasnio je da postoje tri vrste punjenja koje podržava gotovo svaki električni automobil. Prvi je tokom noći, putem kućne utičnice, drugi, kakav je i ispred Direkcije Elektroprivrede, je srednje brzi punjač putem kojeg se automobil puni nekoliko sati, a treći je ultra brzi način koji automobl puni za 20-ak minuta. "Ovo su automobili budućnosti i u svijetu je njihova zastupljenost svake godine duplo veća", dodao je Bosović. Rekao je da će punionica koju je Elektroprivreda stavila na raspolaganje besplatno biti dostupna do daljnjeg, u promotivne svrhe.

OSLOBODENJE

Objavljeno: 21.06.2017.

Problem grijanja u Zenici: Mittal dao rok Gradu do 15. jula

Predstavnici Grada Zenica i ArcelorMittal Zenica pomoć u realizaciji projekta zatražili su od Vlade Federacije BiH i JP Elektroprivreda BiH

Finansijski direktor ArcelorMittal Zenica Nikhil Mehta i menadžerica zaštite okoliša Azra Sivro danas su posjetili Gradsku upravu Zenica i razgovarali sa gradonačelnikom Fuadom Kasumovićem i njegovim saradnicima.

Upoznali su ih oko realizacije projekta izgradnje novih kotlova na zemni gas i interne plinove koji bi riješili problem grijanja u gradu, a koje bi kompanija koristila za svoju proizvodnju uz višestruko ekološki prihvatljivije uslove.

Kako je poznato, u proljeće 2016. godine sa ArcelorMittal Zenica počeli su pregovori oko formiranja joint venture kompanije u kojoj bi Grad Zenica sa 20 posto osnivačkog učešća bio suvlasnik iste. Kako je Grad Zenica kreditno nesposoban i nije u mogućnosti izdati kreditne garancije, Gradska uprava na čelu sa gradonačelnikom Kasumovićem već mjesecima pokušava obezbijediti iznos od pet miliona KM potrebnih za investiranje u kompaniju koja bi trebala nositi ime Toplana Zenica.

- Iz ArcelorMittal Zenica su nam dali do znanja da je 15. juli ove godine krajnji rok do kojeg će čekati učešće Grada u projektu. Oni bi nakon toga krenuli sa gradnjom kotlova za svoju proizvodnju, što ne bi moglo osigurati toplotu za grijanje grada. Obje strane saglasne su da bi to bio veliki udarac za građane Zenice. Ne smijemo ni pomisliti šta bi se desilo ukoliko ne uspijemo osigurati ovaj kapital jer su nam svima još uvijek u sjećanju slike iz prošle zime kada su nam dotrajali kotlovi pucali na temperaturi od minus 22 stepeni, rekao je gradonačelnik Kasumović.

Ovaj problem bit će prezentovan i Gradskom vijeću na sjednici zakazanoj za 29. juni. Predstavnici Grada Zenica i ArcelorMittal Zenica pomoć u realizaciji projekta, vrijednog preko 40 miliona eura, od strateškog interesa za građane Zenice, zatražili su od Vlade Federacije BiH i JP Elektroprivreda BiH.

S ciljem osiguranja grant sredstava ostvareni su kontakti i sa vladama nekih država EU i sa Evropskom bankom za obnovu i razvoj.

[Mirza Dajić](#)

OSLOBODENJE

Objavljeno: 22.7.2017.

Spreman ugovor FTV-a i Elektroprivrede?

Navodno je ugovor već napisan i u njemu se navodi da Elektroprivreda BiH novac od RTV takse uplaćuje direktno na račun Federalne radio-televizije, a ne na onaj jedinstveni

FTV i RTRS duguju više od 11 miliona maraka BHRT-u zbog nepoštivanja Zakona o RTV sistemu, a tu je i zadržavanje sredstava od naplaćene RTV takse na vlastitim računima

Svima je poznato da su javni RTV servisi u Bosni i Hercegovini u teškoj finansijskoj situaciji, što se negativno odražava i na programske sadržaje i ispunjavanje njihove osnovne funkcije i misije. BHRT-u godinama prijeti finansijski kolaps, prije svega zbog nastavka trenda katastrofalnog pada u naplati RTV takse, a rješenja nema ni na vidiku.

Budžetsko finansiranje

U Parlament BiH su nekoliko puta poslani prijedlozi načina naplate takse, kao što je naplata putem računa za struju, ali oni nisu usvojeni. Također, FTV i RTRS duguju više od 11 miliona KM BHRT-u zbog nepoštivanja Zakona o RTV sistemu, a tu je i zadržavanje sredstava od naplaćene RTV takse na vlastitim računima.

Klub hrvatskog naroda Doma naroda BiH uputio je nedavno u proceduru Prijedlog zakona o Javnom RTV sustavu u BiH, prema kojem se Javni RTV servis na teritoriji naše države financira prihodima od RTV taksi, prihodima od marketinga, satelitske distribucije (SAT) i IPTV distribucije. Kako se navodi u prijedlogu, BHRT1 se može sufinansirati iz proračuna BiH do najviše 30 posto planiranih i potrebnih sredstava za rad, RTVFBiH1 i RTVFBiH2 iz proračuna Federacije BiH, kantonalnih, gradskih i općinskih proračuna najviše do 30 posto planiranih i potrebnih sredstava za rad, a RTRS iz proračuna Republike Srpske, gradskih i općinskih proračuna, također najviše do 30 posto.

Kako Oslobođenje nezvanično saznaje iz izvora na Federalnoj televiziji, ovaj entitetski emiter uskoro bi mogao početi vraćati dug BHRT-u.

Naime, sve je spremno za potpisivanje ugovora između Elektroprivrede BiH i Federalne radio-televizije o načinu prikupljanja RTV takse.

Navodno je ugovor već napisan i u njemu se navodi da Elektroprivreda BiH novac od takse uplaćuje direktno na račun Federalne radio-televizije, a ne na jedinstveni račun javnih servisa. Ako ovaj ugovor bude potpisan, sudbina BHRT-a, odnosno novca hitno potrebnog za

opstanak državne televizije, ostaje upitna. Također, kako tvrde naši izvori, kada bude potpisan, to neće biti ugovor između FTV-a i EPBiH, već Elektroprivrede BiH i javnih servisa.

Razmotrene preporuke

Na ovoidmčnoj sjednici Komisije za promet i komunikacije Predstavničkog doma PSBiH, članovi su razmotrili preporuke sa međunarodne konferencije “Nacionalni javni radio-televizijski servis BiH”, održane 13. i 14. juna u Sarajevu.

U raspravi je više članova Komisije iz Federacije BiH iznijelo stav da bi hitno trebalo riješiti finansijske probleme u BHRT-u, a kao jedno od rješenja navedena je naplata RTV takse putem računa za električnu energiju.

[Anja Grabovac-Zvijerac](#)

OSLOBODENJE

Objavljeno 01.08. 2017.

Od augusta naplata RTV takse putem računa za struju

Identičan poslovni Ugovor bit će ponuđen i ostalim domaćim elektroprivrednim preduzećima te se očekuje pozitivan odgovor

Predstavnici JP Elektroprivreda BiH i Javnih servisa, BHRT i RTV Federacije BiH, potpisali su poslovni Ugovor o naplati RTV takse putem računa za električnu energiju, a što će biti iskazano na računima za utrošenu električnu energiju za mjesec august 2017. godine.

Identičan poslovni Ugovor bit će ponuđen i ostalim domaćim elektroprivrednim preduzećima te se očekuje pozitivan odgovor.

"Uspostavom ovakvog sistema naplate RTV takse, putem Ugovora o poslovnoj saradnji sa elektroprivrednim preduzećima na teritoriji cijele BiH, javni servisi Bosne i Hercegovine, u skoro vrijeme bili bi spremni odgovoriti tehničko-tehnološkim i programskim zahtijevima svih stanovnika BiH, te bi sistem javnog emitiranja, prvi put otkada postoji, bio postavljen na poslovno zdrave osnove sa samostalnim i nezavisnim izvorom finansiranja, kako je to slučaj u svim uređenim demokratskim zemljama svijeta.

Poslovnom spremnošću da se uključi u ovaj model, JP EP BiH pokazala je izuzetno visok nivo društvene odgovornosti te stvorila presudno važne pretpostavke da u poslovno osnaženim Javnim servisima BiH i domaća preduzeća, među kojima je i EP BiH, dobiju stabilnog i utjecajnog partnera za razvoj svojih budućih poslovnih aktivnosti.

Javni servisi blagovremeno će informirati građane o detaljima prelaska na naplatu RTV takse putem računa za električnu energiju, uz napomenu da je do zvaničnog početka primjene ovog modela naplate na snazi obaveza aktuelnog plaćanja RTV takse, zaključno sa mjesecom julom 2017. godine", saopćeno je iz BHRT-a.

Od avgusta naplata RTV takse uz račun za struju Elektroprivrede BiH

Objavljeno 01.08.2017.

Predstavnici JP Elektroprivreda BiH i Javnih servisa (BHRT i RTV Federacije BiH) potpisali su poslovni Ugovor o naplati RTV takse putem računa za električnu energiju, a što će biti iskazano na računima za utrošenu električnu energiju za mjesec avgust 2017. godine. Identičan poslovni Ugovor bit će ponuđen i ostalim domaćim elektroprivrednim preduzećima te se očekuje pozitivan odgovor. Uspostavom ovakvog sistema naplate RTV takse, putem Ugovora o poslovnoj saradnji sa elektroprivrednim preduzećima na teritoriji cijele BiH, javni servisi Bosne i Hercegovine, u skoro vrijeme bili bi spremni odgovoriti tehničko-tehnološkim i programskim zahtjevima svih stanovnika BiH, te bi sistem javnog emitiranja, prvi put otkada postoji, bio postavljen na poslovno zdrave osnove sa samostalnim i nezavisnim izvorom finansiranja, kako je to slučaj u svim uređenim demokratskim zemljama svijeta. Poslovnom spremnošću da se uključi u ovaj model, JP EP BiH pokazala je izuzetno visok nivo društvene odgovornosti te stvorila presudno važne pretpostavke da u poslovno osnaženim Javnim servisima BiH i domaća preduzeća, među kojima je i EP BiH, dobiju stabilnog i utjecajnog partnera za razvoj svojih budućih poslovnih aktivnosti. Javni servisi blagovremeno će informirati građane o detaljima prelaska na naplatu RTV takse putem računa za električnu energiju, uz napomenu da je do zvaničnog početka primjene ovog modela naplate na snazi obaveza aktuelnog plaćanja RTV takse, zaključno sa mjesecom julom 2017. godine..

Objavljeno: 01.08.2017.

Naplata RTV takse od avgusta putem računa za električnu energiju

Predstavnici Javnog preduzeća "Elektroprivreda" BiH i Javnih servisa BHRT i RTV Federacije BiH /FBiH/ potpisali su ugovor o naplati RTV takse putem računa za električnu energiju, što će biti iskazano na računima za potrošenu električnu energiju za avgust, saopštili su BHRT i RTV FBiH. Identičan poslovni ugovor biće ponuđen i ostalim domaćim elektroprivrednim preduzećima, te se očekuje pozitivan odgovor. "Uspostavljanjem ovakvog sistema naplate RTV takse, putem ugovora o poslovnoj saradnji sa elektroprivrednim preduzećima na teritoriji BiH, javni servisi bi uskoro bili spremni da odgovore tehničko-tehnološkim i programskim zahtjevima svih stanovnika BiH", navedeno je u saopštenju. Na taj način bi sistem javnog emitovanja, prvi put otkada postoji, "bio postavljen na poslovno zdrave osnove sa samostalnim i nezavisnim izvorom finansiranja", kako je to slučaj u svim uređenim demokratskim zemljama svijeta. "Poslovnom spremnošću da se uključi u ovaj model, `Elektroprivreda` BiH pokazala je izuzetno visok nivo društvene odgovornosti, te stvorila presudno važne pretpostavke da u poslovno osnaženim javnim servisima BiH i domaća preduzeća dobiju stabilnog i uticajnog partnera za razvoj svojih budućih poslovnih aktivnosti", poručili su iz BHRT-a i RTV FBiH. Javni servisi blagovremeno će informisati građane o detaljima prelaska na naplatu RTV takse putem računa za električnu energiju, uz napomenu da je do zvaničnog početka primjene ovog modela naplate na snazi obaveza aktuelnog plaćanja RTV takse, zaključno sa julom.

Objavljeno:10.08.2017.

Potrošnja struje povećana, ali snadbijevanje kupaca nije upitno

Visoke temperature i korištenje klima-uređaja doveli su do povećanja potrošnje električne energije - kažu iz Elektroprivrede BiH, te ističu da su ovakvu situaciju očekivali i da snadbijevanje kupaca električnom energijom ni u kojem slučaju nije upitno. Kako je potvrdila portparolka Javnog preduzeća Elektroprivreda BiH Midheta Kurspahić, ukupna potrošnja kupaca električne energije od Elektroprivrede BiH tokom ljetnih mjeseci je deset posto veća u odnosu na proljetne i jesenje mjesece. - U odnosu na juli 2016. godine, potrošnja u julu 2017. godine je povećana za 2,5 posto – kazala je Kurspahić. Dodaje da, u okviru planiranja i operativnog vođenja sistema elektrana JP EPBiH, analiziraju se varijacije potrošnje kupaca i u ovisnosti od ekstremnih vremenskih prilika, te se vrše pripreme i za takve uslove. - Zbog toga ovi ekstremno topli dani ne mogu dovesti u pitanje snadbijevanje kupaca JP Elektroprivreda BiH - naglasila je Kurspahić. Po njenim riječima, u posljednjih 30 dana najveća potrošnja je zabilježena 4. avgusta i bila je veća za gotovo pet posto u odnosu na očekivanu srednju potrošnju u augustu. - Zanimljivo je da se usljed utjecaja klima-uređaja u toplim vremenskim periodima, najveća potrošnja javlja u poslijepodnevnom, a ne u večernjim satima, kao što je slučaj u ostatku godine – navodi Kurspahić. Ističe i da bez obzira na to da je loša hidrološka situacija u BiH i regiji, snadbijevanje kupaca koje električnom energijom snadbijeva JP Elektroprivreda BiH, nije upitno. Dodaje da se situacija svakodnevno prati, analizira i shodno prognozama, rad proizvodnih objekata se planira u skladu s očekivanim porastom potrošnje.

OSLOBODENJE

Objavljeno:20.09.2017.

ELEKTROPRIVREDA, BH TELECOM I PREVENT NAJBOLJE VELIKE KOMPANIJE U BiH

Osim priznanja za najveće po ukupnom prihodu, dobiti i investicijama, Srebrnim pečatom Poslovnih novina nagrađene će biti tri kompanije

Poslovne novine, povodom 30. izbora 100 najvećih u privredi i 45. godišnjice poslovanja, predstavile su najuspješnije kompanije u prošloj godini, kao i dobitnike priznanja koja će im biti uručena na gala svečanosti u Hotelu Hills u Sarajevu. Predstavljeno je i novo, redizajnirano izdanje publikacije 100 najvećih u BiH u kojem su Poslovne novine, uz rang liste velikih, srednjih i malih kompanija po prihodu, dobiti, izvozu i investicijama gotovinskog toka u 2016. godini i analize vodećih industrijskih grana sa top 20 kompanija u svakoj od njih, prvi put objavile i top 500 kompanija iz regije.

- Na ovogodišnjem izboru 100 najvećih u BiH, dodijelit ćemo rekordan broj priznanja najuspješnijim kompanijama u prošloj godini. Osim priznanja za najveće po ukupnom prihodu, dobiti i investicijama, Srebrnim pečatom Poslovnih novina nagradit ćemo tri kompanije. Posebno mi je zadovoljstvo predstaviti vam naše novo, redizajnirano i brojnim novim sadržajima obogaćeno izdanje Poslovnih novina - 100 najvećih u BiH. U ovom specijalnom izdanju, uz rangiranje skoro 800 kompanija, donosimo analize 13 vodećih industrijskih grana sa 20 top kompanija za svaku od njih. Zahvaljujući našem specijalnom partneru LRC-u, i njihovoj dobroj saradnji s bonitetnim agencijama iz regiona: EL Koncept d.o.o. iz Hrvatske, CUBE d.o.o. iz Srbije, BL Consulting d.o.o. iz Crne Gore, Prve bonitetne agencije d.o.o. iz Slovenije, Infopoint d.o.o. iz Srbije (za podatke kompanija iz Makedonije) u publikaciji 100 najvećih u BiH, objavili smo, po prvi put, rang liste 500 najvećih iz Slovenije, Hrvatske, Srbije, Makedonije i Crne Gore, kazala je Alena Ahmetpahić – Fočo, glavna i odgovorna urednica Poslovnih novina i menadžerica projekta.

Dobitnici priznanja su brojni, a u kategoriji velikih kompanija, po ukupnom prihodu, neto dobiti i izvozu ostvarenom u 2016. godini, najbolji su JP Elektroprivreda BiH (prvo mjesto sa 997.870.238 KM prihoda), BH Telecom (prvo mjesto sa 83.588.626 KM dobiti) i Prevent BH (prvo mjesto sa 320.529.230 KM izvoza). U kategoriji srednjih kompanija najbolje su HEP-Trade iz Mostara (neto dobiti i izvozu ostvarenom u 2016. godini), HETA Sarajevo (prvo mjesto sa 29.692.572 KM dobiti) i HEP-Trade (prvo mjesto sa 34.619.387 KM izvoza). Od malih kompanija najbolje su Venera iz Banje Luke - PJ Tuzla (prvo mjesto sa 7.801.274 KM prihoda), H&L Group iz Sarajeva (prvo mjesto sa 5.301.436 KM dobiti) i VEZA-NEKT Sarajevo (prvo mjesto sa 4.847.383 KM izvoza). Najveći investitor u BiH u 2016. godini je J.P. Elektroprivreda d.d. Sarajevo sa 146.749.314 KM ostvarenih investicija.

FIS iz Viteza zauzeo je prvo mjesto na rang listi industrijske grane Nespecijalizirana trgovina na veliko u 2016. godini, Holdina Sarajevo prvo mjesto na rang listi industrijske grane Trgovina na veliko krutim, tečnim i plinovitim gorivima i srodnim proizvodima u 2016. godini, Bingo Tuzla prvo mjesto na rang listi industrijske grane Trgovina na veliko i na malo u 2016. godini, Elektroprivreda BiH prvo mjesto na rang listi industrijske grane Proizvodnja električne energije u 2016. godini, HIFA - PETROL Sarajevo prvo mjesto na rang-listi industrijske grane Trgovina na malo motornim gorivima u specijaliziranim prodavnicama u 2016. godini, TRANZITEXPORT Sarajevo prvo mjesto na rang-listi industrijske grane Cestovni prevoz robe u 2016. godini, Phoenix iz Bijeljine, prvo mjesto na rang listi industrijske grane Trgovina na veliko farmaceutskim proizvodima u 2016. godini, BH Telecom prvo mjesto na rang listi industrijske grane Djelatnosti žičane telekomunikacije u 2016. godini. DEC, projektna kancelarija, Stanari-Doboj, zauzela je prvo mjesto na rang listi industrijske grane Gradnja stambenih i nestambenih zgrada u 2016. godini, Bimal iz Brčkog, prvo mjesto na rang listi industrijske grane Proizvodnja prehrambenih proizvoda u BiH u 2016. godini, Bajra Travnik, prvo mjesto na rang listi industrijske grane Mesna industrija u 2016. godini, Standard Furniture Factory iz Ilijaša, prvo mjesto na rang listi industrijske grane Proizvodnja namještaja u 2016. godini, NSOFT iz Mostara prvo mjesto na rang listi industrijske grane Računarsko programiranje, savjetovanje i djelatnosti u vezi s njima u 2016. godini.

OSLOBODENJE

Objavljeno: 21. 09. 2017.

DODATNI NAMET ELEKTROPRIVREDI BiH

Vlada Tuzlanskog kantona uputila je inicijativu Vladi Federacije BiH kojom traži izmjene Zakona o izdvajanju i usmjeravanju dijela prihoda preduzeća ostvarenih radom termoelektrana, na način da se Elektroprivredi BiH uvede obaveza plaćanja naknade općinama na čijem području se nalaze rudnici.

Važeći zakon predviđa da općine dobiju dio prihoda od preduzeća ostvarenih radom termoelektrana, odnosno općine na čijem području se nalaze termoelektrane, instalacije ili zemljište na kojem se vrši odlaganje šljake, pepela i sličnog otpada, kao i deponije uglja.

- Ovim zakonom nisu obuhvaćene općine koje imaju rudnike, odnosno prostore za otkopavanje uglja za potrebe termoelektrana, iako je općepoznato da se upravo otkopavanjem uglja stvaraju ogromne posljedice u općini u kojoj se nalaze, kaže Mensur Begić, stručni saradnik za informisanje u Vladi TK-a.

Vlada TK-a smatra da ogromne posljedice trpe ne samo općine koje imaju termoelektrane nego i one u kojim se iskopava ugalj za potrebe TE.

- Usmjeravanjem dijela sredstava predviđenih ovim zakonom, u procentu u kojem učestvuju u isporuci uglja za potrebe termoelektrane, omogućio bi se mali dio satisfakcije i za općinu, smatra Begić.

Ovaj kanton ima rudnike u Tuzli, Živinicama, Banovićima i Lukavcu. Treba napomenuti i to da rudnici već plaćaju koncesionu naknadu za eksploataciju uglja, a taj novac u iznosu od 80 posto ide općinama, dok 20 posto ide Kantonu, pa se ova izmjena čini kao dodatni namet rudnicima, odnosno EPBiH.

OSLOBODENJE

Objavljeno: 27.09.2017.

Piše: Eldar Dizdarević

VISOKI PROFITI I SASTAVLJANJE KRAJA S KRAJEM

Prva polovina 2017. u poslovnom je smislu bila dobra za telekome, banke i pojedina veća preduzeća iz drugih sektora poslovanja. Nažalost, prilično veliki broj bh. kompanija je poslovao sa gubicima

U svijetu finansija postoje dva važna datuma. Prvi je sredinom godine (30. 6.), a drugi krajem fiskalne godine (31. 12.), što predstavlja dane s kojim se obračunavaju polugodišnji i godišnji finansijski izvještaji o poslovanju neke kompanije. S obzirom na to da smo još relativno daleko od kraja 2017, pogledajmo kako su u prvih šest mjeseci poslovale veće bh. kompanije, što će nam pomoći da steknemo dojam kakvo je trenutno stanje u poslovnom životu BiH.

Pogledajmo prvo kako su poslovale najprofitabilnije i najveće bh. kompanije. BH Telecom Sarajevo, jedno od najprofitabilnijih privrednih društava kod nas, prvo polugodište 2017. završio je sa 36,2 miliona KM neto dobiti, što predstavlja povećanje profita od 70 posto u odnosu na isti period lani. Telekom Srpske Banja Luka je iskazao dobit od 21,7 miliona KM, što predstavlja smanjenje profita od 18,7 posto u odnosu na isti period lani, dok je u osnovi ipak najlošije prošao HT Mostar, sa samo 268 hiljada KM dobiti. No, koliko to god čudno zvučalo, ovaj finansijski rezultat je zapravo jako dobar za ovu kompaniju, koja je prvo polugodište 2016. završila sa 1,1 milion KM gubitka.

Najveća bh. kompanija je Elektroprivreda BiH Sarajevo, sa godišnjim prihodom od skoro milijardu KM. No, taj i toliki prihod, pa čak ni poslovanje u uvjetima prirodnog monopola, nisu bili dovoljni menadžmentu ove kompanije da posluje pozitivno. Sredinom godine iskazan je gubitak od 22,8 miliona KM, što je prevashodno, kako tvrde upućeniji, posljedica katastrofalno lošeg ugovora sa mostarskim Aluminijem. Naime, Elektroprivreda BiH je u prvom kvartalu ove godine prodavala Aluminiju struju po cijeni od 37 eura po MWh, dok je u isto vrijeme, kako prenose mediji, zbog manjka kupovala struju na tržištu po 100 ili čak 120 eura po MWh. Naravno, s takvom poslovnom politikom niko, pa ni Elektroprivreda BiH, ne može biti pozitivan.

Elektroprivreda BiH će taj minus, kako trenutno stvari stoje, pokušati anulirati sa novim, višim cijenama električne energije za domaćinstva i privredu. Računi bi već do sada bili uvećani, no, s obzirom na to da je Elektroprivreda BiH nedavno počela fakturisati na svojim

računima i RTV taksu, povećanje cijena struje je vjerovatno prolongirano za neko dogledno vrijeme, čim se malo stišaju strasti u javnosti. Kako će Elektroprivreda BiH proći u svemu tome, ostaje da se vidi, ali ovoj kompaniji nikako ne ide u prilog liberalizovano tržište električne energije i postojanje više od dvadeset licenciranih dobavljača u BiH zbog mogućeg "prebjega" klijenata u budućnosti.

Elektroprivreda HZHB Mostar prvo polugodište 2017. završila je sa 452 hiljade KM neto dobiti, što je manje nego u istom periodu lani kada je dobit iznosila 2,2 miliona KM. No, ovo se javno preduzeće oporavilo nakon što se uspjelo osloboditi ugovora sa Aluminijem, zbog kojeg je nedavno moralo otpisati više od 100 miliona KM gubitka. Čak se i danas dobit ove kompanije usmjerava u pokrivanje gubitaka iz prethodnog perioda.

Situacija sa Elektroprivredom RS-a Trebinje daleko je komplikovanija, prevashodno zbog ekstremno složenog ustroja društva. Iako je ovaj mješoviti holding u prvom polugodištu 2017. ostvario 48 miliona KM prihoda od prodaje električne energije, rezultat poslovanja ove kompanije je gotovo nebitan i ne pokazuje zapravo ništa. Elektroprivreda RS-a je sastavljena od 11 zavisnih kompanija (pet proizvodnih, pet distributivnih i IRC), u kojima ima po 65 posto suvlasništva - izuzev u slučaju IRC-a u kojem ima 51 posto. Stoga je zapravo mnogo važnije kako su poslovala proizvodna preduzeća, tri hidrocentrale i dvije termoelektrane, jer to pokazuje stvarno stanje u holdingu. RiTE (akronim od rudnik i termoelektrana) Ugljevik prvo polugodište je završio sa 17,9 miliona KM gubitka, pri čemu RiTE Gacko još nije objavio polugodišnji izvještaj o poslovanju. No, sa velikom dozom sigurnosti se može pretpostaviti da sve baš i nije u najboljem redu sa termoelektranom Gacko, s obzirom na nedavne promjene menadžmenta te na gubitak od 4,1 milion KM lani. Osim toga, planom za 2017. ovog društva predviđena je dobit od milion KM, ali je istim planom predviđen i gubitak od 12 miliona KM u narednoj godini! Očigledno je da nešto ne štima u RiTE Gacko.

Hidroelektrane na Vrbasu Mrkonjić-Grad prvo polugodište su završile sa 912 hiljada kM dobiti, a Hidroelektrane na Drini Višegrad sa 4,3 miliona KM gubitka. Hidroelektrane na Trebišnjici Trebinje još nisu objavile polugodišnji izvještaj o poslovanju, ali jedno je sigurno: organizaciona šema Elektroprivrede RS-a i zavisnih preduzeća - koju su nametnuli predstavnici međunarodne zajednice radi lakše i jeftinije privatizacije - nije donijela ništa dobro ovim kompanijama. Vrijedi napomenuti da su predstavnici međunarodne zajednice istu sudbinu namijenili i federalnim elektroprivredama, ali razbijanje ovih infrastrukturnih javnih preduzeća na sitnije dijelove nije provedeno uglavnom zbog konstantnih političkih natezanja i svađa u FBiH, a ne, nažalost, zbog osmišljenog otpora toj ekonomski gledano prilično sumanutoj ideji.

Banke su u prvom polugodištu 2017. ostvarile rekordne poslovne rezultate, pri čemu su samo u FBiH u prvih šest mjeseci iskazale dobit od oko 152 miliona KM. Od ostalih kompanija pomenimo samo neke. Energopetrol Sarajevo je konačno uplovio u pozitivne vode sa 6 miliona KM polugodišnje dobiti. Sarajevski Milkos je uknjižio 207 hiljada KM dobiti, Vispak Visoko 581 hiljadu KM dobiti, Standard Furniture Factory Sarajevo 608 hiljada KM profita, Pobjeda Rudet Goražde 720 hiljada KM, Riba Neretva Konjic 196 hiljada, Klas Sarajevo milion KM dobiti i tako dalje.

Nažalost, prilično veliki broj kompanija u BiH je iskazao i negativan polugodišnji rezultat, no, ovoga ih puta nećemo pominjati. Pomenut ćemo, s obzirom na to da je riječ o jednoj od najvećih privatiziranih bh. kompanija, samo Rafineriju nafte Brod, koja je prvo polugodište

2017. završila sa minusom od 7,5 miliona KM. No, kompanija iz sastava iste grupacije, Rafinerija ulja Modriča, u istom je periodu iskazala dobit od 1,4 miliona KM.

Očigledno, prva polovina 2017. godine u poslovnom je smislu bila dobra za telekome, banke i pojedina veća preduzeća iz drugih sektora poslovanja. Nažalost, prilično veliki broj kompanija je poslovaao sa gubicima - i to velikim - ali u većini slučajeva riječ je o gubitašima od kojih su se mogli i očekivati takvi rezultati. Hronični gubitaši uglavnom su kompanije u kojima politika donosi poslovne odluke ili su pak loše i neadekvatno privatizirane kompanije, u kojima opet, nažalost, politika donosi konačne poslovne odluke. Naravno, sve se pomenuto odnosi na velike bh. kompanije, velika dionička društva, dok mali, kao i do sada, preživljavaju kako znaju i umiju te pri tome jedva sastavljaju kraj s krajem.

OSLOBODENJE

Objavljeno: 03.10.2017.

Elektroprivreda BiH i Bingo među sto najuspješnijih kompanija JI Evrope

Poslovni portal SeeNews objavio je svoju redovnu godišnju rang listu stotinu najuspješnijih kompanija iz jugoistočne Evrope na osnovu njihovog ukupnog prihoda za 2016. godinu

Desetu godinu uzastopno poslovni portal SeeNews objavio je svoju redovnu godišnju rang listu stotinu najuspješnijih kompanija iz jugoistočne Evrope na osnovu njihovog ukupnog prihoda za 2016. godinu, zatim stotinu najvećih banaka na osnovu njihovih ukupnih sredstava, kao i stotinu najvećih osiguravajućih kompanija na osnovu njihovih bruto premija, za regiju jugoistočne Evrope. Ukupni neto profit najvećih kompanija porastao je za 39 posto u poređenju s profitom iz prethodnih godina.

Bosna i Hercegovina ima dva predstavnika na rang listi od stotinu kompanija - Elektroprivredu BiH i lanac prodavnica Bingo. Godinu dana ranije imala je samo jednog. Na rang listi se nalaze kompanije iz Albanije, Bosne i Hercegovine, Bugarske, Kosova, Makedonije, Moldavije, Crne Gore, Rumunije, Slovenije, Srbije i Hrvatske.

Kompanije iz Rumunije, najveće i najefikasnije ekonomije regije, dominirale su svim rang listama. Rumunija ima 59 predstavnika među stotinu najboljih na rang listi SeeNews, što predstavlja rast s 55 od godinu dana ranije.

Najveća kompanija u jugoistočnoj Evropi po ukupnom prihodu također je rumunska - proizvođač vozila Dacia, jedinica grupacije Renault. Prihod kompanije porastao je za osam posto, na 4, 619 milijardi eura, a neto profit je povećan na 100,5 miliona eura s 99 miliona u 2015. Rumunska Banca Comerciala Romana SA na vrhu je rang liste banaka jugoistočne Evrope, javio je SeeNews.

Više od 15 godina, SeeNews je tržišni lider u poslovnim informacijama za jugoistočnu Evropu, uspješno pomažući ekspertima u ključnim industrijama regije kao što su bankarstvo, osiguranje, energetika, telekomunikacije, automobilska industrija, farmacija i građevinski sektor, u donošenju poslovnih i investicijskih odluka. Među klijentima kompanije su, između ostalih, IBM, Uniq, Wolftheiss, HypoNoe Group, Solunska berza, Reuters, Dow Jones, Lexis Nexis i Bureau van Dijk.

[Minela Pamuk](#)

OSLOBODENJE

Objavljeno:05.10.2017.

Elektroprivreda BiH dobitnik Ruže ZEPS-a

U sklopu sajma ZEPS danas su Elektroprivreda BiH i BBI banka potpisale sporazum o pokretanju usluge e-režije
Grand Prix Ruža ZEPS-a ove godine pripala je JP Elektroprivreda BiH, kojoj je ovo jedinstveno priznanje uručeno kao izlagaču koji je svojim nastupom obilježio sajam.

Intermetal

U sklopu 24. generalnog BH sajma ZEPS uručene su i medalje kvaliteta Ruža ZEPS-a za prehrambene proizvode koje su dobile kompanije: Zenička industrija mlijeka d.d. Zenica, Vitinka a.d. Zvornik, Eko-etna Zenica, Klas, Vispak, te Kupres-Milch.

Dodijeljena su i priznanja izlagačima u dvije kategorije i to za proizvod kompaniji Borac Travnik, za kolekciju proizvoda prvo mjesto pripalo je firmi strojno ključarstvo "Simon Jeram" Gorenje, dok je za promociju priznanje otišlo u ruke firme Dron.ba Kakanj.

U okviru 14. specijaliziranog sajma metala - ZEPS Intermetal dodijeljena su priznanja za proizvod i promociju, a prva mjesta u ovim kategorijama pripala su kompanijama "Lović&Co" Lukavac, te kompaniji Gazela d.o.o. Krško.

U sklopu sajma ZEPS jučer su JP Elektroprivreda BiH i BBI banka potpisale sporazum o pokretanju usluge e-režije, kojom je omogućeno jednostavnije i jeftinije plaćanje mjesečnih računa za električnu energiju.

E-režije

Korisnici usluge e-režije će moći platiti račun za električnu energiju bez ispunjavanja uplatnice i bez naknade ukoliko zatraže da račune dobijaju elektronskim putem. Svi kupci električne energije koji račun dobivaju elektronskim putem, a koji pristupe usluzi e-režije od 1.10. 2017. do 1.10. 2018, ostvaruju pravo plaćanja računa bez provizije prvu godinu korištenja, od dana aktivacije usluge. U okviru usluge e-račun Elektroprivrede BiH, građanima je sada omogućen i povoljniji rok plaćanja računa, odnosno 30 dana umjesto 15, koliko imaju korisnici sa papirnom dostavom računa.

OSLOBODENJE

Objavljeno:27.10.2017.

Od nedjelje novi termini jeftinije struje

Za domaćinstva koja posjeduju dvotarifna brojila, manji dnevni tarifni stavovi primjenjivat će se radnim danima i subotom od 13 do 16 sati i od 22 do 7 sati, a nedjeljom cijeli dan

Prelaskom na zimsko računanje vremena, u nedelju, 29. oktobra, doći će do promjene u primjeni većih i manjih dnevnih tarifnih stavova (perioda tzv. jeftinije i skuplje električne energije) za kupce koje električnom energijom snabdijeva Javno preduzeće Elektroprivreda BiH d.d. – Sarajevo, saopćeno je iz ovog preduzeća.

Za domaćinstva koja posjeduju dvotarifna brojila, manji dnevni tarifni stavovi primjenjivat će se radnim danima i subotom od 13 do 16 sati i od 22 do 7 sati, a nedjeljom cijeli dan.

Za ostale kategorije kupaca JP EPBiH utrošena električna energija obračunavat će se prema manjoj tarifi (MT) radnim danima od 22 do 7 sati, a subotom i nedeljom cijeli dan, navodi se u saopćenju.

[Oslobodjenje PORTAL](#)

OSLOBODENJE

Objavljeno: 6. 11. 2017.

Najveća proizvodnja uglja od rata

Gračanica, Breza i Kakanj u prvih devet mjeseci 2017. pozitivno poslovali • U septembru pozitivni Kreka i Bila .Najveća godišnja proizvodnja u 110-godišnjoj historiji rudnika Breza Posebno dobar rezultat ostvario je Rudnik Breza koji je u prvih deset mjeseci 2017. ispunio godišnji plan od 560.000 tona komercijalnog uglja

Rudnici Koncerna Elektroprivrede BiH u oktobru i ukupno za period januar-oktobar ove godine ostvarili su najveću proizvodnju uglja od ulaska u Koncern. U sedam rudnika uglja u sastavu Koncerna u proteklom mjesecu proizvedeno je 509.770 tona uglja, što je najveća ostvarena mjesečna proizvodnja uglja od rata.

Planska proizvodnja

- Dolaskom na ovu poziciju u Vladi Federacije mi smo postavili jasan koncept oporavka rudnika koji je predviđen u četiri godine. Ono što smo do sada uradili u prethodne dvije godine je da smo u 2016. godini podigli proizvodnju za 430.000 tona te da smo u prvih deset mjeseci 2017. podigli proizvodnju u odnosu na prethodnu godinu za još 500.000, što ukupno čini oko 950.000 tona. Ovaj rezultat je omogućio da rudnici iz ogromnih dubioza i minusa u poslovnom smislu počnu poslovati pozitivno. Radi se o rudnicima Gračanica (Gornji Vakuf/Uskoplje), Breza i Kakanj koji su za devet mjeseci 2017. godine pozitivno poslovali. U septembru smo imali još i Kreku i Bilu koji su također pozitivno poslovali. Sve je to pomoglo da imamo uglja u elektranama, da za prvih deset mjeseci ove godine termoelektrane u Tuzli i Kaknju ostvaruju plansku proizvodnju, izjavio je za Oslobođenje Nevad Ikanović, izvršni direktor za proizvodnju u JP EPBiH.

On je objasnio da je ovo rezultat jasnog koncepta rada i provođenja u rudnicima zajedno sa upravom Elektroprivrede i da je malo ko mogao pretpostaviti da će biti ostvareni ovako dobri rezultati.

- Vjerovao sam da imamo snage, kapaciteta i znanja da, uprkos teškom i složenom stanju u rudnicima, zajedničkim radom i jasnom vizijom možemo ostvariti ovakve rezultate. To se pokazalo u 2016, a pokazuje se i u 2017. godini. Ono što nas dalje očekuje jeste nastavak procesa restrukturiranja rudnika uglja, da se izvrše transformacije u određenim cjelinama i da radimo konstantno na povećanju proizvodnje i podizanju sigurnosti i zaštite u rudnicima za uposlenike, te da investicioni ciklus privedemo kraju kako bismo imali konačno ekonomski održive rudnike, istakao je Ikanović.

Još 100.000 tona

Posebno dobar rezultat ostvario je Rudnik Breza koji je u prvih deset mjeseci 2017. ispunio godišnji plan od 560.000 tona komercijalnog uglja. Prema riječima direktora Čamila

Zaimovića, očekuje se da će do kraja godine iskopati još 100.000 tona uglja. Sveukupno će, veli, to biti rekordna godišnja proizvodnja uglja u historiji ovog ugljenokopa dugoj 110 godina.

- Uvođenjem novog čela, Breza će izbaciti komorni način rada i na taj način povećati humanizaciju rada i ostvarivati još bolje rezultate, poručio je Zaimović.

Proizvedeno 509.770 tona uglja

Ostvarivanje većeg plasmata uglja osiguralo je rudnicima uglja u koncernu veće prihode. U prvih devet mjeseci 2017. prihodi su veći za 33.789.462 KM ili 15,33 posto u odnosu na isti period u 2016, odnosno veći za 48.424.736 KM ili 23,5 posto u odnosu na isti period 2015. godine, dok su troškovi zadržani skoro na istom nivou u sve tri posmatrane godine.

U periodu januar-oktobar 2017. u JP Elektroprivreda BiH ostvarena je ukupna proizvodnja električne energije od 5.768 GWh.

[Mirza Dajić](#)

Objavljeno :12.12.2017.

Finansijski rezultati pokazuju dubiozu: Gubici „Elektroprivrede BiH“ 21,1 milion maraka!

Državna kompanija „Elektroprivreda BiH“ (EPBiH) za devet mjeseci ove godine zabilježila je gubitak od oko 21,1 milion maraka, pokazali su finansijski rezultati poslovanja, otkriva „Dnevni avaz“.

Danas NO

Prema tim rezultatima, sasvim je izvjesno da će EPBiH godinu završiti u minusu, što se posljednji put desilo 2010., u eri generalnog direktora Amera Jerlagića. Finansijski izvještaj o poslovanju našao se jučer i pred članovima Nadzornog odbora (NO) „Elektroprivrede BiH“ na sjednici u Sarajevu, ali zbog obimnog dnevnog reda nije razmatran te će o njemu biti govora danas.

Upravo je NO EPBiH sredinom septembra ove godine, a na zahtjev resornog ministra energije Nermina Džindića, tražio precizan sanacioni plan mjera od Uprave EPBiH kako bi se enormni gubici smanjili, a povećala proizvodnja struje i nabavka uglja.

No, za tri mjeseca, od juna do septembra, „Elektroprivreda“ je smanjila gubitak za svega 1,7 miliona maraka, što je, ako se uzme broj uposlenih i sanacioni plan, mizeran rezultat. Gubitak za pola godine iznosio je, naime, 22,8 miliona KM.

Prodali viškove

Gubici u poslovanju dolaze u trenutku kada je ova državna firma skoro pa sakrila informaciju od javnosti da je već prodala viškove električne energije za nerednu godinu i pritom zaradila 28 miliona maraka (14 miliona eura).

Ali, u prvom kvartalu, „Elektroprivreda BiH“ struju je proizvodila i prodavala po 42,60 eura po megavat-satu, a na berzi kupovala i po 115,29 eura po megavat-satu u januaru, a u februaru i po 125,52 eura. Samo u januaru kupljeno je struje za 36,9 miliona KM, a u februaru za 28,2 miliona KM.

Ništa od mjera sanacije

Nadzorni odbor u septembru je čak, nezadovoljan mjerama sanacije, odbio prijedlog Uprave EPBiH, koja je u nadi da sanira milionske gubitke, izbjegla da smanji enormne plaće, po čemu su rekorderi u državi. Ovakav plan, u kojem je predviđeno samo povećanje proizvodnje struje i nabavka uglja, okarakteriziran je kao paušalan i nedovoljno razrađen, a Upravi je dat rok da dostave novi. Ali, ni novi nije dao rezultate.

OSLOBODENJE

Objavljeno: 20. decembra 2017.

Federalno ministarstvo okoliša i turizma odbilo izdati okolišnu dozvolu Elektroprivredi BiH

Ove sedmice je okončana višemjesečna javna rasprava o zahtjevu za okolinsku dozvolu za zatvaranje odlagališta šljake i pepela Plane, Divkovići 1 i 2, Termoelektrane "Tuzla". Nakon što je u nekoliko navrata Elektroprivredi BiH ukazano na sve propuste u dostavljenoj dokumentaciji i pokušaja da iste isprave, zbog katastrofalno loše i neupotreblljive dokumentacije koju je po narudžbi Termoelektrane "Tuzla" pripremila konzultantska kuća Rudarski institut d.d. Tuzla, Ministarstvo je odbilo da izda okolinsku dozvolu za zatvaranje odlagališta šljake Plane, Divkovići 1 i 2.

Istim Rješenjem je Elektroprivredi naloženo da u što kraćem roku dostavi novi zahtjev i dokumentaciju kojom će se jasno definisati konkretne mjere koje Termoelektrana "Tuzla" mora provesti da bi se spriječilo daljnje uništavanje okoliša i zdravlja stanovnika tog područja koje uzrokuje zatvorena deponija.

"Nevladine organizacije su u nekoliko navrata praktično uradile stručne revizije Studije i ostale dokumentacije koju je dostavila Elektroprivreda, ali nažalost konzultantska kuća i TE "Tuzla" su uporno odbijale da prihvate naše sugestije i urade Studiju u skladu sa zakonskim propisima", izjavio je Rijad Tikveša iz "Ekotima".

Goran Stojak, predstavnik građana ugroženih naselja je rekao: "Mi smo ministarstvu slali svoje komentare a i tokom javne rasprave smo objasnili naš stav da je Studija puna izmišljenih podataka i neistina".

U stvarno stanje na tom području se uvjerila i ministrica Đapo tokom njene nedavne posjete i razgovora sa predstavnicima lokalnog stanovništva. "Drago nam je da je napokon neko iz vlasti došao da nas sasluša i nakon toga reaguje", dodao je Stojak.

Ova deponija šljake i pepela je zvanično zatvorena polovinom 2015. godine, i sa tog područja se i dalje nekontrolisano širi zagađenje teškim metalima iz šljake putem površinskih i procijednih voda. Termoelektrani je trebalo preko dvije godine da pripremi neupotreblljivu Studiju, a u međuvremenu su samo uradili "tehničku rekultivaciju" što u prevodu znači, nasuli su tanak sloj zemlje i crvene gline preko šljake sa namjerom da spriječe dizanje prašine. Na toj površini je u protekle dvije godine uspijevala jedino ambrozija.

Postavlja se pitanje da li i zašto rukovodstvo TE Tuzla odugovlači proces propisne remedijacije ove deponije ako su još prije nekoliko godina na sastancima sa građanima tog područja izjavljivali da imaju spremne milione za remedijaciju tog prostora. Ovo otezanje se događa uz svesrdnu podršku i zaštitu od strane Federalne inspekcije za okoliš koja, po našim saznanjima, u dvije i po godine od kako je odlagalište zvanično zatvoreno, niti jednom nije provjerila i utvrdila šta se događa sa procijednim i površinskim vodama kojim se raznose teški metali iz šljake, a koji su štetni za okoliš i zdravlje ljudi sa tog područja. Također nisu utvrdili da li je TE Tuzla provela bilo kakvu konkretnu mjeru kojom bi se spriječilo to zagađenje, što im je bila obaveza prema Zakonu o zaštiti okoliša. Ako jesu, bilo bi dobro da se javnost upozna sa sadržajem tog inspekcijskog izvještaja i da se objavi da li je neko iz te "strateške" firme sankcioniran za kršenje odredbi zakona o zaštiti okoliša. Možda su eksperti Rudarskog instituta, u čijim prostorijama su Federalni inspektori podstanari, "na riječ" ubijedili inspektore da je sve u redu.

Nadamo se da je ovo samo prva u nizu odbijenica nekvalitetnih studija uticaja na okoliš na osnovu kojih je Ministarstvo do sada izdavalo okolinske dozvole i da će buduće Studije i okolinske dozvole biti stvarni instrument zaštite okoliša i zdravlja građana, a ne ispričnica "strateškim" firmama. Također, očekujemo da će Ministarstvo i inspekcije primjeniti zakonske ovlasti i primorati Termoelektranu "Tuzla" da što prije ispuni svoje zakonom propisane obaveze zaštite okoliša na području zatvorenog odlagališta šljake i pepela, te da u što kraćem roku dostavi novi zahtjev za okolinsku dozvolu sa propisanom dokumentacijom i da na tom području provede sve mjere zaštite okoliša i zdravlja građana, navedeno je u saopštenju Centra za ekologiju i energiju.

[Oslobođenje PORTAL](#)

Objavljeno:30.12.2017.

Šta se krije u usvojenom planu poslovanja: EPBiH procijenio gubitak na 21,8 miliona maraka!

Skupština „Elektroprivrede BiH“ usvojila je Plan poslovanja za period 2018.-2020. godina, u kojem su navedena ulaganja od 1,68 milijardi maraka u proizvodnju, distribuciju, snabdijevanje i kapitalne projekte, ali i dokapitalizaciju rudnika.

Kapitalni projekti

Strateški ciljevi, kako tvrde u EPBiH, su početak izgradnje pet kapitalnih projekata, od kojih su prioritet Blok 7 TE Tuzla, vjetroelektrane Podveležje i male hidroelektrane na Neretvici. Početak izgradnje hidroelektrana Janjići i Una – Kostela planiran je za kraj 2020. godine.

Plan ulaganja u kapitalne projekte iznosi 1,37 milijardi KM, a ukupna planirana proizvodnja električne energije za period od 2018. do 2020. godine iznosi 21.873,6 gigavatsati. Planirani godišnji prihodi su veći od milijardu KM, dok je nabavka uglja za plansku godinu veća od šest miliona tona.

No, u dokumentima se navodi da je procjena dobiti u 2018. godini 15,9 miliona KM, 34,4 miliona u 2019., a u 2020. godini 33,9 miliona KM. Ono što je zanimljivo je da Uprava procjenjuje da će 2017. završiti u minusu od čak 21,8 miliona maraka.

Ključni pokazatelji o Društvu

OPIS	2015.	2016.	2017. procjena	2018.	2019.	2020.
Registr. dionički kapital na dan 31.12. (mil. KM)	2.237	2.237	2.237	2.237	2.237	2.237
Operativni prihod (mil.KM)	946,1	988,8	1.103,3	1.008,1	1.010,5	1001,1
Operativni rashodi (mil.KM)	772,6	814,8	990,3	839,5	820,9	804,2
EBITDA (mil.KM)	173,5	174,0	113,0	168,6	189,6	196,9
Dobit/Gubitak (mil.KM)	3,6	12,9	-21,8	15,9	34,4	33,9
Proizvodnja (GWh)	6.909	7.245	7.110	7.342	7.393	7.138
Prodaja (GWh)	7.033	7.845	9.290	7.697	7.461	7.239
Broj kupaca (kraj godine)	740.918	750.495	758.000	765.000	772.000	780.000
Broj zaposlenih (kraj godine)*	4.616	4.568	4.458	4.424	4.386	4.351

* zaposleni na neodređeno vrijeme

Odluka o ključnim pokazateljima Društva otkriva gubitak

Upoznali NO

Nedavno smo objavili da je za devet mjeseci gubitak 21,1 milion KM, dok su iz Uprave uvjerali Nadzorni odbor da će gubitak na kraju godine biti oko 15 miliona KM. Ali, plan koji su usvojili pokazuje suprotno. Za pola godine ostvaren je gubitak od 22,8 miliona KM i od juna do decembra, kako stvari stoje, manji je samo za milion KM.

Za dokapitalizaciju rudnika 55 miliona KM

Planirana je i dokapitalizacija rudnika uglja putem ulaganja u iznosu od 55 miliona KM.

U dokumentu se navodi da je potrebno posebnu pažnju posvetiti i poslovanju zavisnih društava rudnika uglja kroz poboljšanje poslovanja na način da se izvrši dokapitalizacija i modernizacija te prestrukturiranje u rudnicima, što će za rezultat imati povećanje produktivnosti, odnosno pozitivno poslovanje ovih subjekata.